

ერთი მხრივ, შპს „სსპ აფთიაქი“ (შემდგომში „გამყიდველი“) წარმოდგენილი მისი დირექტორის კახაბერ ფანჭულიძის სახით და მეორე მხრივ, სსიპ „აკადემიკოს ივანე ჯავახიშვილის სახელობის ქალაქ თბილისის #53 საჯარო სკოლა“ (შემდგომში „მყიდველი“) წარმოდგენილი მისი დირექტორის მარიამ რამინაშვილის სახით, მხარეთა ორმხრივი ნების თავისუფალი გამოვლენის საფუძველზე ვდებთ წინამდებარე ხელშეკრულებას შემდეგზე:

პრეამბულა

მხარეები სრული პასუხისმგებლობით აცხადებენ, რომ მათ გააჩნიათ სრული სამართლებრივი უფლებამოსილება აღნიშნული ხელშეკრულების დასადებად და მის შესასრულებლად, ისინი ერთმანეთის უფლებებს პატივისცემით ეპყრობიან და მოქმედებენ საქართველოს მოქმედი კანონმდებლობის სრული დაცვით.

1. ხელშეკრულების საგანი

- 1.1. გამყიდველი კისრულობს ვალდებულებას გადასცეს საკუთრებაში მყიდველს ხელშეკრულებით გათვალისწინებული საქონელი (შემდგომში „საქონელი“) მყიდველის მიერ წარდგენილი (წერილობითი ან ზეპირი) შეკვეთა-განაცხადის საფუძველზე. მყიდველი ვალდებულებას კისრულობს მიიღოს საქონელი და გადაიხადოს მისი ღირებულება წინამდებარე ხელშეკრულებით გათვალისწინებული წესით;
- 1.2. საქონელს წარმოადგენს მედიკამენტები, სამედიცინო-სახარჯი მასალა და სხვა სამედიცინო დანიშნულების საგნები;
- 1.3. გამყიდველის მიერ მყიდველისათვის ხელშეკრულებით გათვალისწინებული საქონლის მიწოდება (გადაცემა) მოხდება N 157 აფთიაქიდან მისამართზე: ქ.თბილისი, პეტრიაშვილის ქ. N26.

2. ხელშეკრულების ფასი და ანგარიშსწორების პირობები

- 2.1. წინამდებარე ხელშეკრულებით საქონლის საფასურის ოდენობა განისაზღვრება ყოველ კონკრეტულ შემთხვევაში, გამყიდველის მიერ მიწოდებულ საქონელზე შედგენილი სასაქონლო ზედნადების მიხედვით;
- 2.2. სასაქონლო ზედნადები წარმოადგენს წინამდებარე ხელშეკრულების განუყოფელ ნაწილს;
- 2.3. წინამდებარე ხელშეკრულებით ანგარიშსწორება ხორციელდება ნაღდი ან/და უნაღდო ანგარიშსწორების წესით მყიდველის მიერ მოთხოვნილი საქონლის მიღებიდან არაუმეტეს 2 დღის ვადაში;
- 2.4. წინამდებარე ხელშეკრულების საერთო ღირებულება ამ ხელშეკრულების მოქმედების განმავლობაში შეადგენს 600 (ექვსასი) ლარს.
- 2.5. საქონლის ფასი განისაზღვრება ეროვნულ ვალუტაში.

3. მხარეთა უფლება-მოვალეობანი

3.1. მყიდველის უფლება-მოვალეობები:

- 3.1.1. მყიდველი უფლებამოსილია წინამდებარე ხელშეკრულების მოქმედების პერიოდში გამყიდველის სასაქონლო პრეისკურანტის (პრაის ლისტი) შესაბამისად, ნებისმიერ დროს წინასწარ მიაწოდოს შეკვეთა-განაცხადი შესაძენი საქონლის დასახელების, დოზირების, რაოდენობის მითითებით;
- 3.1.2. მყიდველი უფლებამოსილია შეამოწმოს გამყიდველის მიერ მიწოდებული საქონლის ხარისხის შესაბამისობა ხელშეკრულებით გათვალისწინებულ პირობებთან;
- 3.1.3. შეკვეთის დაკომპლექტების შემდეგ მყიდველი უფლებამოსილია საქონლის მიწოდების (გადაცემის) ადგილზე გამყიდველის წარმომადგენელთან ერთად შეამოწმოს საქონლის რაოდენობა, ვარგისიანობა და მიიღოს საქონელი სასაქონლო ზედნადების შესაბამისად;
- 3.1.4. მყიდველი ვალდებულია საქონლის მიღებისას გამყიდველს წარუდგინოს მინდობილობა, თუ აღნიშნული მინდობილობის წარდგენა სავალდებულოა შეძენილი საქონლის სპეციფიკიდან გამომდინარე;

3.1.5. მყიდველი ვალდებულია წინამდებარე ხელშეკრულების 2.3. პუნქტში მითითებულ ვადაში სრულად გადაუხადოს გამყიდველს მიწოდებული საქონლის საფასური.

3.2. გამყიდველის უფლება-მოვალეობები:

3.2.1. გამყიდველი ვალდებულია მყიდველისაგან შეკვეთა-განაცხადის მიღებისთანავე დროულად დაუკომპლექტოს მყიდველს საქონელი შეკვეთა-განაცხადში მითითებული სახეობის, დოზირების, რაოდენობის ზუსტი გათვალისწინებით;

3.2.2. გამყიდველი ვალდებულია წარუდგინოს მყიდველს თავისი სასაქონლო ჩამონათვალი (პრასის ლისტი), საჭიროების შემთხვევაში აგრეთვე შემოთავაზებული საქონლის ხარისხის სერთიფიკატი და მათი რეგისტრაციის მოწმობა;

3.2.3. გამყიდველი უფლებამოსილია მოსთხოვოს მყიდველს წინამდებარე ხელშეკრულებით გათვალისწინებული საქონლის საფასურის ანაზღაურება ხელშეკრულებით გათვალისწინებული პირობებით;

3.2.4. გამყიდველი ვალდებულია დაიცვას ხელშეკრულებით გათვალისწინებული ყველა პირობა.

4. მხარეთა პასუხისმგებლობა

4.1. მყიდველის მიერ წინამდებარე ხელშეკრულების 2.3. პუნქტში მითითებული საქონლის საფასურის გადახდისთვის გათვალისწინებული ვადის გადაცილების შემთხვევაში გამყიდველი იტოვებს უფლებას ჯარიმის სახით მყიდველს დააკისროს პირგასამტეხლო გადასახდელი თანხის 0,1%-ის ოდენობით ყოველ გადაგადაცილებულ დღეზე; პირგასამტეხლოს გადახდა არ ათავისუფლებს მყიდველს ვალდებულებების სრულად და ჯეროვნად შესრულებისაგან.

4.2. მხარეები კისრულობენ ვალდებულებას აუნაზღაურონ მეორე მხარეს მათ მიერ წინამდებარე ხელშეკრულების შეუსრულებლობით ან არაჯეროვანი შესრულებით მიყენებული ზიანი.

5. ფორს-მაჟორი

5.1. არც ერთ მხარეს არ დაეკისრება პასუხისმგებლობა ხელშეკრულებით გათვალისწინებული ვალდებულებების მთლიანი ან ნაწილობრივი დარღვევისთვის, თუ აღნიშნული გამოწვეული იქნება ისეთი გარემოებების გამო, როგორცაა: მიწისძვრა, წყალდიდობა, ხანძარი, სტიქიური უბედურებანი, ომი და საომარი მოქმედებანი, ხელისუფლების მიერ მიღებული ამკრძალავი ნორმები და საქართველოს კანონმდებლობით გათვალისწინებული სხვა შემთხვევები;

5.2. მხარე, რომლისთვისაც 5.1. მუხლში აღნიშნული მიზეზების გამო შეუძლებელი შეიქმნა დაკისრებული ვალდებულებების შესრულება, ვალდებულია მისი დადგომის და დამთავრების მომენტიდან არაუგვიანეს 5 დღისა წერილობით აცნობოს აღნიშნულის შესახებ მეორე მხარეს;

5.3. მხარეების მიერ ხელშეკრულებით გათვალისწინებული ვალდებულებების შესრულება გადაიდება ფორს-მაჟორული გარემოებების ლიკვიდაციამდე.

5.4. მხარეები ვალდებული არიან შეუდგნენ ხელშეკრულებით გათვალისწინებული ვალდებულებების შესრულებას ფორს-მაჟორული გარემოებების აღმოფხვრისთანავე.

6. დავის გადაწყვეტა

6.1. მხარეთა შორის წარმოშობილი ნებისმიერი დავა და უთანხმოება წყდება მოლაპარაკების გზით. შეთანხმების მიუღწევლობის შემთხვევაში დავა განიხილება სასამართლოში საქართველოს კანონმდებლობის შესაბამისად;

6.2. პირველი ინსტანციის სასამართლოს მიერ მიღებული გადაწყვეტილება უნდა მიექცეს დაუყოვნებლივ აღსასრულებლად საქართველოს სამოქალაქო საპროცესო კოდექსის 268 - ემუხლის 1¹ ნაწილის შესაბამისად.

7. ხელშეკრულების მოქმედების ვადა

7.1. წინამდებარე ხელშეკრულება ძალაშია მხარეთა მიერ მისი ხელმოწერის დღიდან და მოქმედებს 2014 წლის 31 დეკემბრის ჩათვლით.

7.2. წინამდებარე ხელშეკრულება შეიძლება შეწყდეს წინამდებარე ხელშეკრულებითა და საქართველოს კანონმდებლობის გათვალისწინებული წესით.

